

Ո Ր Ո Շ ՈՒ Մ

Ճանապարհային ոստիկանության վարչական տույժ նշանակելու մասին թիվ 2112954371, 2112990188, 2113181829, 2113210911 որոշումներն անփոփոխ, իսկ վարչական բողոքն առանց բավարարման թողնելու մասին

<< 07 >> 09 2021թ. 7-13- 13662

ք.Երևան

Ճանապարհային ոստիկանության պետ, ոստիկանության գնդապետ Ե.Կարապետյանս, վերանայելով Սամվել Կարապետյանի ՄԴ/69247-21 դիմումի քննարկման արդյունքում ստեղծված նյութերը՝

Պ Ա Ր Զ Ե Ց Ի

Քաղաքացի Սամվել Կարապետյանը (**ծանուցման հասցե՝ քաղաք Երևան, Կենտրոն վարչական շրջան, Թումանյան փողոց, 28/20 շենք, 35 բնակարան**) դիմումով խնդրել է վերանայել Ճանապարհային ոստիկանության վարչական տույժ նշանակելու մասին թիվ 2112766312, 2112887964, 2112954371, 2112990188, 2113181829, 2113210911 որոշումները՝ նշելով, որ ազատ կայանատեղի չլինելու պատճառով պարբերաբար կատարել է իրավախախտումներ՝ Տերյան-Մոսկովյան փողոցների խաչմերուկի հատվածում, որը կապված է եղել իր անչափահաս երեխային դպրոցից դիմավորելը:

Դիմումի քննարկման արդյունքում պարզվել է, որ թիվ 2112954371, 2112990188, 2113181829, 2113210911 որոշումները ենթակա են կատարման հետևյալ պատճառաբանությամբ.

<< կառավարության <<Ճանապարհային երթևեկության կանոնները և տրանսպորտային միջոցների շահագործումն արգելող անսարքությունների ու պայմանների ցանկը սահմանելու մասին>> թիվ 955-Ն որոշման 80-րդ կետի համաձայն՝ տրանսպորտային միջոցը տեղակայել թույլատրվում է երթևեկելի մասի եզրին զուգահեռ մեկ շարքով՝ բացառությամբ այն տեղերի /երթևեկելի մասի տեղային լայնացում/, որտեղ գծանշմամբ թույլատրված են տրանսպորտային միջոցների դասավորման այլ ձևեր:

Իրավախախտումներն ամրագրած տեսանյութերը փաստում են, որ դիմումատուին պատկանող տրանսպորտային միջոցը բոլոր դեպքերում էլ տեղակայված են երթևեկելի մասի երկրորդ շարքում:

Հարկ է նշել, որ Ճանապարհային ոստիկանության վարչական տույժ նշանակելու մասին թիվ 2112954371 որոշմամբ ամրագրված տեսանյութի **տևողությունը 80** վայրկյան է, թիվ 2112990188 որոշմամբ ամրագրված տեսանյութի **տևողությունը՝ 61** վայրկյան է, թիվ 2113181829 որոշմամբ ամրագրված տեսանյութի **տևողությունը 80** վայրկյան է, թիվ 2113210911 որոշմամբ ամրագրված տեսանյութի **տևողությունը 61** վայրկյան է:

Վարչական իրավախախտումների վերաբերյալ << օրենսգրքի 124-րդ հոդվածի 39-րդ մասի համաձայն՝ սույն հոդվածի 21-րդ և 25-րդ մասերով (միայն կանգառ կատարելու մասով) նախատեսված վարչական իրավախախտումն ունի նվազ նշանակություն այն դեպքում, երբ կանգառը կատարվել է միայն ուղևորների նստելու կամ իջնելու նպատակով, չի գերազանցել **մեկ րոպե** ժամանակահատվածը, և դրա հետևանքով երթևեկության մյուս մասնակիցների համար խոչընդոտ կամ վթարային իրադրություն առաջացնելու ակնհայտ վտանգ չի ստեղծվել:

Տեսանյութերը փաստում են, որ կանգառը չի կատարվել միայն ուղևոր նստելու կամ իջնելու նպատակով, գերազանցել է **սահմանված մեկ րոպե** ժամանակահատվածը, ուստի իրավախախտումները նվազ նշանակություն ունենալ չեն կարող:

Վարչական իրավախախտումների վերաբերյալ ՀՀ օրենսգրքի 124-րդ հոդվածի 21-րդ մասի համաձայն տրանսպորտային միջոցների վարորդների կողմից կանգառի և (կամ) կայանման կանոնները խախտելը՝ առաջացնում է տուգանքի նշանակում՝ սահմանված նվազագույն աշխատավարձի հնգապատիկի չափով, տուգանային միավորի կիրառում՝ 0.5 միավոր:

Ինչ վերաբերվում է Ճանապարհային ոստիկանության վարչական տույժ նշանակելու մասին **թիվ 2112766312, 2112887964** որոշումներին, ապա սահմանված կարգով առաքվել են հասցեատիրոջը, սակայն փոստային ծառայության կողմից վերադարձվել են ճանապարհային ոստիկանություն և Վարչական իրավախախտումների վերաբերյալ ՀՀ օրենսգրքի 283-րդ հոդվածի համաձայն այն 31.05.2021թ.-ին և 06.07.2021-ին հրապարակվել են Հայաստանի Հանրապետության հրապարակային ծանուցումների պաշտոնական ինտերնետային կայքում՝ (**azdarar.am**):

Վերը նշված նորմի համաձայն անձը համարվում է պատշաճ ծանուցված որոշումներն ինտերնետային կայքում տեղադրելու օրվան հաջորդող հինգերորդ օրը՝ 07.06.2021թ. և 12.07.2021թ., հետևաբար 20.08.2021թ. դիմում ներկայացնելով, Ձեր կողմից բաց է թողնվել Վարչական իրավախախտումների վերաբերյալ ՀՀ օրենսգրքի 288-րդ հոդվածով նախատեսված՝ վերը նշված որոշումների դեմ գանգատ տալու 30-օրյա ժամկետը:

Ինչ վերաբերվում է դիմումատուի խնդրանքին՝ ըմբռնումով մոտենալուն, ապա ՀՀ Սահմանադրության 6-րդ հոդվածի 1-ին մասի համաձայն՝ պետական և տեղական ինքնակառավարման մարմիններն ու պաշտոնատար անձինք իրավասու են կատարելու միայն այնպիսի գործողություններ, որոնց համար լիազորված են Սահմանադրությամբ կամ օրենքներով:

Այսպիսով հիմնավորվել է, որ դիմումատուին վարչական պատասխանատվության ենթարկելու մասին վերը նշված որոշումներն իրավաչափ են և օրինական:

Ելնելով վերոգրյալից և ղեկավարվելով Վարչական իրավախախտումների վերաբերյալ ՀՀ օրենսգրքի 293-րդ հոդվածի 1-ին մասի 1-ին կետով՝

Ո Ր Ո Շ Ե Ց Ի

1. Ճանապարհային ոստիկանության վարչական տույժ նշանակելու մասին թիվ 2112954371, 2112990188, 2113181829, 2113210911 որոշումները թողնել անփոփոխ, իսկ վարչական բողոքն առանց բավարարման:
2. Սույն որոշումն ուժի մեջ է մտնում հանձնելու օրվան հաջորդող օրը և կարող է բողոքարկվել ՀՀ վարչական դատարան օրենքով սահմանված կարգով և ժամկետներում:
3. Սույն որոշման օրինակն ուղարկել Սամվել Կարապետյանին:



Ե. Կարապետյան